

Isumaqatigiinniareernikkut isumaqatigiissusiorani imaluunniit periutsit taakku marluk ataatsimoortillugit suliaasat pillugit isumaqatigiissusiornermut tunngavissaqalernissamut suliarinnittussarsiorarneq pillugu inatsisip atorneqarata iluaqutaanik ajoqutaanillu takutitsisumik Naalakkersuisut UKA2020 nallertinnagu nassuiaasiornissaamik peqquneqarnissaannik Inatsisartut aalajangiiffigisassaattut siunnersuut. Nalunaarusiaq siunissami sullissinermit isumaqatigiissutinut tunngatillugu inassuteqaatinik imaqartariaqarpoq.

(Inatsisartuni ilaasortaq Tillie Martinussen, Suleqatigiissitsisut)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Aallarniutigalugu Naalakkersuisuniit aalajangiiffigisassatut siunnersuut pillugu qujavugut.

Isumalluutitta isumatusaartumik atorneqarnissaannik isummernermit Naalakkersuisut isumaqataapput, aningaasat ataasiaannarlutik atorneqarsinnaammata.

Kiffartuussinermut isumaqatigiissutit ullumikkut ingerlatseqatigiiffinit sisamanit isumagineqarput – Air Greenland A/S-imit, Disko Line A/S-imit, Nordlandair ehf-mit aamma Arctic Umiaq Line A/S-imit. Air Greenland aamma Arctic Umiaq Line Namminersorlutik Oqartussanit 100 %-imik pigineqarput, Air Greenlandip Norlandair-ip 25 %-ia pigisaralugu.

Taamaattumik Naalakkersuisut ullumikkut kiffartuussinermut isumaqatigiissutini kiffartuussinernik tamanik, suliffeqarfinnit ingerlatseqatigiiffinit assigiinngitsunit namminersornermit inatsisit ataanni aqqissuussaasunit pisisareerput.

Kiffartuussinermut isumaqatigiissutit ornigassatut tunngavissanut pingaarnernut pingasunut aggugaapput, tassalu

- assartuussinissamut periarfissaqarfiunngikkaluanut
- akit peqqutaallutik amerlasuut angalasinnaanngiffigisaraluinut
- akulikissutsit akuersaarneqarsinnaanngitsumik akuttuffissaraluinut

Ornigassat tamakkerlutik kiffartuussinermut isumaqatigiissutinut ilaatinneqanngillat, taamaallaalli niuernikkut imminnut nammassinnaanngitsutut naliliiffigineqartut ilaatinneqarput.

Kiffartuussinermut isumaqatigiissuteqartoqanngippat isorliunerusunut ukioq kaajallallugu assartuussinissamut periarfissaqartitsisoqarnissaa qulakkeerneqarsinnaanngilaq, tassalu inoqarfiit ilaasut amerlassusaast ikittuinnarnik tunngavissallit najukkamut najukkamiillu angalanissamut periarfissaqanngeratarsinnaapput.

2019-imi upernaakkut ataatsimiinnermi nunatsinni attaveqaatinut, angallannerup ilusaanik kiffartuussinermullu isumaqatigiissutinik ilaatitsiviusussamik pilersaarusiornissamut Sanaartornermut Ataatsimiititaliaq Naalackersuisunut kaammattuivoq. Tamanna Naalackersuisut maanna suliaanut naapertuuppoq, taamaalillunilu imaatigut, nunakkut silaannakkullu attaveqaatit ataqatigiinnissaat naleqquttuunissaallu qulakkeerneqarsinnaassaaq.

Taamaattumik siunnersuut Naalackersuisunit taparserneqarpoq, aammalu ilaasunik angallassinermut sullinnissamut isumaqatigiissutit ataanni angallassinermi suliassat pillugit isumaqatigiissusiornermut tunngavissaqalernissamut suliarinnittussarsiortarneq pillugu inatsisip atorneqarata iluaqutai ajoqutaalu pilersaarutissami ilanngutissallugit. Pilersaarut siunissami kiffartuussinermut isumaqatigiissusiassanut inassuteqaatinik imaqassaaq.